

老谱家规

子必孝亲不孝者惩 弟必恭兄不恭者惩

子弟必敬尊长不敬者责其父兄惩之

各宜安分守己如有侵占人家田地以及牵牛掘塍之行为者惩

子弟习牌赌开烟馆酗酒行凶有则惩之

子弟不得诱骗人家妇女为妻有则惩之

妻无败行男子不得擅出实不能存活者族人理应保全以示体恤或男子游

惰不务正业者惩

凡夫故之遗妻已嫁于异姓无论何人不得再行娶回为妻违者重惩

妇女不得放泼尤赖服毒横闹违者罪其夫

子弟须务正业家虽贫不得为倡优为皂隶为奴仆致玷家风

凡遇族间发生竞争事端须大家和平解决如有教唆成讼希图渔利致人荡

废家产者惩之

各房祖坟山如原有进葬之例其后葬者不得 塞祖塋若无进葬之例不得

盗葬违者从重议处

坟山为祖宗体魄所藏祖宗体魄有伤子孙之心何安四时祭扫必躬亲邱墓之地有坍塌宜时修补荆榛杂树亦随时芟除坟山界址尤宜时加巡守免他人侵越

子弟虽贫经书不可不读又能读朱子小学尤佳

父母不幸至于大故必行三年之丧以尽人子之心世道虽变此礼尤不可废
现今新政道路以宽平为准

兹有无知识者削塍为田毁界为土并低塌处不为修培殊干例禁

老谱家训

孝父母

诗曰父兮生我母兮鞠我又曰哀哀父母生我劬劳其顾复之恩靡所底止凡心为人子者各随力量而行富贵固当膏粱致养贫贱亦可菽水承欢孝无常人患不能自尽耳倘兄弟贫富不一供养不可相攀贤愚不一睚眦不可相怨即妻子亦宜时时嘱咐勿使有伤亲心诚以孝者天之经也地之义也民之行也其可忽乎哉

友兄弟

兄弟者分形连气之人也羽翼相附如手如足苟或因资财未均而兴角弓之怨惟妇言是听而有鬩墙之虞自翦其羽翼自伤其手足也可不懼夫殊不知人之兄弟和睦上可安父母之心下可起刑于之法雍雍和气萃于一堂其各勉旃

训子弟

子弟之率不谨皆由父兄之教不先防检坏而荡越多背叛侵凌难以免矣当其知识未开之日啟其德性遏其邪心养其良知良能及长教以孝弟忠信礼义廉耻等事果习与性成无越轨行为能貽父母令名为乡里表示此非自教训中来乎

肃闺门

礼始于谨夫妇辨内外男子居外女子居内卽授受之间亦不可忽闺门正则一家男女亦无不正为家长者宜教诲而整齐之使之孝翁姑和妯娌勤纺织操井白屏豔冶绝戏谑毋许入寺烧香垂帘观剧诟詈妬忌贪食多言则妇道克尽古语云闺门之内肃若朝廷

谨嫁娶

婚姻之道为子孙隆替所由关家道兴衰所自起使不慎之遂贪慕资财以子女为奇货徒求姿色与仆贱为姻家门户既属不当閒检素多不立安定胡先生曰嫁女必须胜吾家者胜吾家则女之事人必敬必戒娶妇必须不若吾家者不若吾家则妇事舅姑必执妇道诚哉是言

睦宗族

宗族之所以不睦者亦有由矣富者无推解之意贫者生觖望之思或货财相竞不念同气之情或意见偶乖顿失宗支之义小忿未捐倾排遂起同室者又不与讲尊卑长幼之道凉薄由此益多昔田氏由分而合荆树復荣此虽兄弟盛事推之可及一门一族凡属高曾以下当念一本所分厚而弗薄亲而弗疏每遇岁时豆觴可以讲让设立家塾教诲可以明伦既有同好弃恶之心自消尔虞我诈之见

如此敦睦可保宗族于久远

和邻里

古者五家为邻二十五家为里比屋而居烟火相接出入相友守望相助疾病相扶持岁时伏腊更欢然乐聚乃不失古人浹比之意否则视同秦越一室而外皆荆棘矣古语云远水难救近火远亲不如近邻我族人宜体念之

择交游

五伦之中朋友居一人固未有孑然独处者然必结交善人亲近好友则大而学问功名相与有成小而持身涉世亦能相助若以勤俭浑樸为俗人以嫖赌逍遥为高致而且好酒贪杯不寻生活损人利己不顾天良此等人最不可近近之未有不受害者古语云近朱者赤近墨者黑可见交游之得失即成败之所由分也可不慎歟

勤生业

国家首重农桑农桑即民生之本也力田有勤惰故收获有多寡况一年之计在于春一生之计在于勤其可惰农自安任其田之汙莱乎但族间人丁甚多间有无田土可作者或学艺术或做买卖亦可以膳其身家倘游手好閒则富者易贫贫

者终莫能富矣不鉴诸

去奢侈

祖宗之创业维艰子孙之守成不易近见豪门巨族田连阡陌不数年而地无立锥者由奢侈之所致也宫室衣服饮食一切应酬不极其工不知无怪其以无限之财日削月匮也故居家自养父母外皆宜俭朴凡冠婚丧祭各循其分宫室车马毋取乎华古语云常将有日思无日莫把无时作有时能三复斯言可长保家道而勿替矣

息讼端

辱身倾家莫过于讼近日人心险很好以架词健讼为能不知讼端一起则有茶烟酒食以及胥吏保歇之费用多縱赢了官司亦输了钱朱子云居家戒争讼讼则终凶非虚言也尤可耻者捏诬唆讼嵌害善良图包私囊此等人宜拒绝之

戒牌赌

牌赌乃盗贼之媒为害极深小则毁名裂行大则荡产倾家吾族子弟须知有用之年华切勿消磨于牌赌之中古诗云凡人百艺好随身赌博场中莫去亲能使英雄为下贱更教富贵作饥贫衣衫襤褸亲朋笑田地消磨骨月嗔不信但看乡党

内眼前败了几多人

重賙恤

救急扶危原人生之大义鰥寡孤独顛连困苦世所不免虽未必尽人而济之惟在量力而行或宗族乡党有贫乏不能安葬者须急为措置如徒多積以诒子孙而分毫不舍子孙倘不能能守積之何益施惠本不望报而广行阴德自可上格窮苍易曰積善之家必有余庆

慎喪葬

凡事之大而其最难当者则莫过于送死凡衣衾棺槨及一切喪葬之事虽称家之有无亦当竭力营辦不可稍有吝惜之意至于安厝之地只要内则用甄圻修砌坚固外则加工緊筑勿使阳水渗入孟子曰非直为美观也然后尽于人心

省坟墓

先人之魂气归于天体魄归于地未有久而不忘者必刊碑勒石为记而后可垂于不朽凡父兄每逢新年及清明时节宜携幼子童孙拜墓且悉为之指示或有崩蹋先当培补或有荆棘或宗族乡党有贫乏不能安葬者须急为措置如徒多積以诒子孙而分毫不舍子孙倘不能守積之何益施惠本不望报而广行阴德自可上格窮苍易曰積善之家必有余庆

完赋税

赋税乃国家之正供完纳即人民应尽之义务不可拖欠拖欠则胥吏追催差役勒索反受其累果能依时输纳丝毫无欠则吏役不得过我门鸡犬亦以甯于室何等轻便何等安乐其各凜遵